

每週經課朗誦經文(巴克禮台語漢字)2012/12/30

共同經課 - 1 撒母耳記上二章十八節~二十節，二十六節

18 彼時，撒母耳猶細漢，穿幼苧布的以弗得，佇耶和華的面前服事。19 閣伊的老母逐年給伊做一領細領的長衫，及伊的丈夫上來獻年祭的時帶來互伊。20 以利給以利加拿及伊的某祝福，講：「願耶和華對此個婦仁人閣賞賜你後裔，來替所還互耶和華的。」in就倒去本所在。26 囡仔撒母耳漸漸大漢，得著耶和華及人愈疼伊。

共同經課 - 2 詩篇一百四十八篇

1 恁著謳啫耶和華！對天頂謳啫耶和華，佇高的所在謳啫伊！2 伊的眾使者啊，恁著謳啫伊！伊的眾天軍啊，恁著謳啫伊！3 日及月啊，恁著謳啫伊！發光的星辰啊，恁攏著謳啫伊！4 天頂的天及天以上的水啊，恁攏著謳啫伊！5 諸個攏著謳啫耶和華的名！因為伊一下命令就攏受創造。6 伊將諸個建立，到永永遠遠；伊有定例，袂會廢無。7 對地上著謳啫耶和華，就是大魚及一切的深淵，8 火及冰雹，雪及雲霧，趁伊的話的狂風，9 大山及一切的小山，結果子的樹及一切的柏香樹，10 野獸及一切的精牲，蟲thoa及飛鳥，11 世上的君王及萬民，貴族及世上一切的審判官，12 少年人及在室女，老人及囡仔，13 諸個攏著謳啫耶和華的名！因為只有伊的名受尊做高；伊的榮光搬(pôaⁿ)過天地。14 伊興起伊的百姓的角，互伊聖的百姓攏謳啫伊，就是以色列人，親近主彼個百姓，恁著謳啫耶和華！

共同經課 - 3 歌羅西書三章十二節~十七節

12 恁既然互上帝所揀，是聖也得著疼的，著用憐憫的心、及仁慈、謙卑、溫柔、吞悞來穿。13 設使二彼有挾嫌，就著相寬容，相赦免；親像主曾赦免恁，恁也著按呢。14 佇諸個的頂面，著穿仁愛，就是完全的結聯。15 著互基督的和平佇恁心內做主；恁受召成做一體，也是為著此個；閣著感謝。16 著互基督的道理，佇逐樣的智慧充滿佇恁的心，用詩、用歌、用神的賦，相教示，相苦勸，對恩典佇心內啲吟來謳啫上帝。17 閣凡所做的，或是講或是行，攏著佇主耶穌的名來做伊，也對伊來感謝父上帝。

共同經課 - 4 路加福音二章四十一節~五十二節

41 逐年搬(pôaⁿ)過節的時，伊的父母去耶路撒冷。42 到伊十二歲的時，照節期的例攏上耶路撒冷。43 節期已經明白，in倒去的時，囡仔耶穌猶住佇耶路撒冷。伊的父母毋知，44 拍算伊佇同行的人的中間，行一日的路，才佇親戚及相識的人的中間尋伊，45 尋無著，就倒轉去耶路撒冷尋伊。46 三日後，尋著伊佇殿裡，坐佇許個先生的中間，也啲聽，也啲問。47 聽伊的人，攏奇怪伊的聰明及伊的應答。48 父母看見伊就印愕。伊的老母對伊講：「子啊！你啥事按呢款待阮？你看，你的父及我傷心尋你！」49 伊給in講：「啥事尋我？豈毋知我應該佇我的父的厝嗎？」50 in袂曉得，伊所給in講的話。51 耶穌就及in落去，到拿撒勒，來承順in。伊的老母將諸個話攏記佇心裡。52 耶穌的智慧及年歲愈加添，上帝及人愈疼伊。